



Zahvalnica je uručena i Oslobođenju / AMER KAJMOVIĆ

## Oslobođenje je od početka uz Savez

Savez paraplegičara i oboljelih od dječije paralize FBiH obilježio je 40 godina rada promovisanjem prava osoba sa invaliditetom i podjelom zahvalnica

Savez paraplegičara i oboljelih od dječije paralize Federacije BiH obilježio je 40 godina rada, a tim povodom jučer je u Sarajevu organizirana konferencija "Promovisanje prava i podizanje svijesti o pitanjima osoba sa invaliditetom".

Na konferenciji se govorilo o pravima osoba sa invaliditetom, na koji način se mogu obratiti instituciji Ombudsmana i šta ta institucija može uraditi za njih. Prezentiran je i Fond za profesionalnu rehabilitaciju i zapošljavanje osoba sa invaliditetom, te su održana predavanja o novim metodama u rehabilitaciji i o metodama iz psihologije. Organizovana je i svečanost na kojoj su dodijeljena priznanja institucijama i osobama koje su pomogle u radu Saveza, a zahvalnicu je dobilo i Oslobođenje.

Generalni sekretar Saveza Elvira Bešlija je tim povodom kazala da je Oslobođenje od početka uz Savez.

- Oslobođenje - znači oslobođenje. Recimo, od diskriminacije,

stigmatizacije, od izolacije, oslobođenje od svega, rekla je Bešlija i pohvalila rad naše kuće.

Predsjedavajuća Institucije ombudsmana za ljudska prava BiH Nives Jukić posebno je naglasila razloge zbog kojih pišu preporuke kada im se obraćaju osobe sa invaliditetom.

Najčešće je to, kako kaže, jer osobe sa invaliditetom u Sarajevu nemaju pristup javnom prevozu.

- A da ne govorimo o problemima sa parkingom. Koliko sam upoznata, ništa se ne radi na poboljšanju. Iz godine u godinu ponavljam da Sarajevo nema javni prevoz za osobe sa invaliditetom, istaknula je Jukić.

Kao jedan od problema je navela i izgradnju zgrada bez ispoštovanih standarda i pristupa osobama sa invaliditetom.

- Problem su i ortopedski pomagala, pravo na izbor asistenata u obrazovanju i zapošljavanje. Zbog toga svega se osobe sa invaliditetom i obraćaju našoj instituciji, kazala je Jukić.

**BERINA BAHTANOVIĆ**